

auch wol aus denselben in die schwere noth fallen/
vnd darüber sterben müssen / So habe ich gleichs-
fals von mancherley Fieber der Kinder / so wol auch
der erwachsenen Personen / einen nützlichen berichte
mit angehenckt / daß also diß Arzneybuch ein fein
rund vnd vollstendig Werck seyn möchte / daraus
sich Weiber vnd Jungfrawen / betagte vnd junge
Personen / reich vnd arme / in fürfallender Noth /
gutes Raths erholen köndten.

Vnd nach dem die Wolgeborne vnd Edle Fraw /
Fraw Dorothea / geborne Gräfin von Solms /
Gräfin zu Mansfeld / Edle Fraw zu Heldringen /
E. S. G. G. geliebte Fraw Ruhme / wol löblich vnd
Christseliger Gedechnis / von wegē irer G. Gott-
seligkeit / grossen Geschicklichkeit vnd Erfahrung /
in vielen schweren Weiber vnd Kinderfrancckhei-
ten / weiland weit vnd breit beruffen / vnd nicht al-
lein armer gemeiner Leute in der Graffschafft
Mansfeld vnd anderswo ein grosser Schatz vnd
Trost war / in dem / daß J. G. niemands ohne hülff-
fe / so oft sie darumb angelanget worden / von sich
liessen / vnd deßhalben hierzu eine eigene Apotecke
mit grosser vnkost hieltē / sondern auch viel Christ-
licher Könige / Chur vnd Fürsten offtmals von J.
G. guten rath vnd hülffe begerten / auch derselben
köstliche weisse vnd gelb Aqua vitæ, herrliche Sal-
ben